

Сергей Васильев

ЫҢЫАХ ЫРЫАТА

Күндээрэр күөх халлаан
Күнүн уота чабылыида,
Орто туруу бараан дойду
Унаар түптэтэ күөдьүйдэ,
Күн сириин дыоно
Күөх от дэйбиирдэннэ,
Үүнэр үтүө норуот
Үкэр күөх үктэллэннэ.
Туой буорбут
Торбо күөх отугар
Тунуйбут уоһахтанна,
Аан Ийэ дойдубут
Ача күөх отугар
Абаммыт этэттэннэ.
Сиэр биэбит үүтэ
Симэхтээх сири иһиккэ
Сирилэччи сүүрдэ,
Көгөччөр биэбит үүтэ
Көбүөр аяхха
Күрүлэччи көөһүнө.
Кэрдийс дьэрэкээн ойуулаах
Кэриэн ымыһа кэккэлээтэ,

Чопчу көмүс ойуулаах
Чороон аях чуоҕуйда,
Мандаар матаар ойуулаах
Матааччах иһит бааралаата,
Таналайдаах талахтаах
Далбар чабычач ханыылаата.
Күндээрэр киэн халлаан
Күлүмнээбитин туһугар,
Күрэн буор кырыс
Көҕөрбүтүн аатыгар —
Уйгулаах түһүлгэ олохтонно,
Эбэрдэлээх ыһыах ыһылынна.
Дьоллоох сааспыт тухары
Дьохуннаһан-маанылаһан үөскээбит
Дьон-сэргэ тоҕуоруйан
Чороон иһиппитин көтөҕүөбүт эрэ,
Күөх буорбут үрдүгэр
Күндүлэһэн-маанылаһан үөскээбит
Күн айыы дьоно көрсүһэн
Көйүү кымыстан көбүрэтиэбин эрэ!
Эдэр ыччат мустан
Эһиэкэйдээн эйээрдin,
Оҕо-уруу мустан
Оһокайдаан чугдаардын,
Сыыдам-быһый атахтаах

Сырсан сылыбырайдын,
Хатан ингиир быччыннаах
Халбарыйан халарыктаатын.
Туойар-ыллыыр идэлээх
Томторболоох күөмэийн
Доллонното олордун,
Күөрэтэр-дьиэрэтэр куоластаах
Көндөй көмүс күөмэийн
Көнкөннөтө оонньоотун!
Уйгулаах ыһыахпыт
Уруйа улааттын,
Айхаллаах оонньоубут
Алгыһа дуорайдын!
Тунах ыһыабы ыспыт
Томтор сирбит
Торбо күөх туораахтаннын,
Кырдал сирбит
Кырааскалаах оттоннун,
Силээн үрэхпит
Сибэккилээх симэхтэннин,
Кинкир тайбабыт
Киистэлээх нуоҕайданнын!
Тураҕас биэбит
Тунаҕа барҕардын,
Улаан биэбит

Уйгута дэбилийдин!

Тингэһэ ынахпытын

Тигээйи тикпэтин,

Көгөччөр атырбытын

Күлүмэн ытырбатын,

Кунан оѳуспутугар

Кумаар олорботун,

Саадьяҕай ынахпытыгар

Сахсырҕа саантаабатын!

Кэлэр да өттүгэр

Кэриэн ымыһа

Кэккэлии турдун,

Аныгы да өттүгэр

Арыы чэчир

Аннылла турдун!

Унаар түптэ

Уруйдуу турдун,

Ыаллаах сайылык

Ырыата дьиэрэйдin!